

საჯარო სამართლის იურიდიული პირი -
ბათუმის შოთა რუსთაველის სახელმწიფო უნივერსიტეტი

ბრძანება № 01-02/51

ქ. ბათუმი

17 მარტი, 2023 წელი

ბსუ-ს პროფესიულ საგანმანათლებლო პროგრამების სამუშაოზე დაფუძნებული სწავლების ფორმით განხორციელების პროცესში ჩართული პრაქტიკის ობიექტის შეფასების წესის დამტკიცების თაობაზე

„უმაღლესი განათლების შესახებ“ საქართველოს კანონის 22-ე მუხლის, ბსუ-ს წესდების მე-13 მუხლის, „ბსუ-ს პროფესიული საგანმანათლებლო პროგრამების სასწავლო პროცესის მარეგულირებელი წესის დამტკიცების შესახებ“ ბსუ-ს რექტორის 2019 წლის 8 თებერვლის №01-02/11 ბრძანების, „პროფესიული საგანმანათლებლო პროგრამის/მოკლე ციკლის საგანმანათლებლო პროგრამის/პროფესიული მომზადების პროგრამის/პროფესიული გადამზადების პროგრამის სამუშაოზე დაფუძნებული სწავლების ფორმით განხორციელების წესისა და პირობების დამტკიცების შესახებ“ საქართველოს მთავრობის 2022 წლის 9 აგვისტოს N416 დადგენილების მე-3, მე-4 და მე-5 მუხლების, პროფესიული პროგრამების მართვისა და უწყვეტი განათლების ცენტრის სასწავლო პროცესის მართვის მენეჯერის 2023 წლის 15 მარტის № 298306 სამსახურებრივი ბარათის საფუძველზე,

ვ ბ რ ძ ა ნ ე ბ :

1. დამტკიცდეს ბსუ-ს პროფესიულ საგანმანათლებლო პროგრამების სამუშაოზე დაფუძნებული სწავლების ფორმით განხორციელების პროცესში ჩართული პრაქტიკის ობიექტის შეფასების წესი წინამდებარე ბრძანების დანართი N1-ის შესაბამისად.
2. დაევალოს საინფორმაციო ტექნოლოგიების სამსახურს ამ ბრძანების ბსუ-ს ვებგვერდზე განთავსება (პროფესიული პროგრამების ველში).
3. წინამდებარე ბრძანება აღსასრულებლად და სახელმძღვანელოდ დაეგზავნოს ბსუ-ს სტრუქტურულ ერთეულებს (პროფესიული პროგრამების მართვისა და უწყვეტი განათლების ცენტრს, რექტორის მოადგილეებს, ადმინისტრაციის ხელმძღვანელს, ფაკულტეტებს, საქმისწარმოების სამსახურს (კანცელარია),

იურიდიულ დეპარტამენტს, ხარისხის უზრუნველყოფის სამსახურს და საფინანსო-ეკონომიკური დეპარტამენტს.)

4. ბრძანება ძალაშია ხელმოწერისთანავე.
5. ბრძანება შეიძლება გასაჩივრდეს მისი გამოცემიდან ერთი თვის ვადაში ბათუმის საქალაქო სასამართლოში (ქ. ბათუმი, სტეფანე ზუბალაშვილის №30).

რექტორი, პროფესორი



მერაბ ხალვაში

„ბსუ-ს პროფესიულ საგანმანათლებლო პროგრამების სამუშაოზე დაფუძნებული სწავლების ფორმით განხორციელების პროცესში ჩართული პრაქტიკის ობიექტის შეფასების წესის დამტკიცების თაობაზე“

ბსუ-ს რექტორის 2023 წლის 17 მარტის N 01-02/51 ბრძანების

დანართი N1

ბსუ-ს პროფესიულ საგანმანათლებლო პროგრამების სამუშაოზე დაფუძნებული სწავლების ფორმით განხორციელების პროცესში ჩართული პრაქტიკის ობიექტის შეფასების წესი

მუხლი 1. ზოგადი დებულებები

წინამდებარე წესი არეგულირებს საჯარო სამართლის იურიდიული პირი - ბათუმის შოთა რუსთაველის სახელმწიფო უნივერსიტეტის (შემდგომში „ბსუ“ ან „უნივერსიტეტი“) პროფესიული საგანმანათლებლო პროგრამების სამუშაოზე დაფუძნებული სწავლების ფორმით განხორციელების პროცესში ჩართული პრაქტიკის ობიექტის (შემდგომში „პრაქტიკის ობიექტი“) შეფასებას.

მუხლი 2. სამუშაოზე დაფუძნებული სწავლების ფორმები

1. სამუშაოზე დაფუძნებული სწავლება გულისხმობს პროგრამით გათვალისწინებული ზოგიერთი სწავლის შედეგის მიღწევას რეალურ ან/და იმიტირებულ სამუშაო გარემოში.
2. პროგრამით განსაზღვრული ზოგიერთი სწავლის შედეგის რეალურ სამუშაო გარემოში მიღწევა შესაძლებელია დუალური ან კოოპერაციული სწავლებით.
3. პროგრამით განსაზღვრული ზოგიერთი სწავლის შედეგის იმიტირებულ სამუშაო გარემოში მიღწევა შესაძლებელია განხორციელდეს ბსუ-ში.

მუხლი 3. დუალური და კოოპერაციული სწავლება

1. დუალური სწავლება გულისხმობს უნივერსიტეტისა და ამ წესის მე-4 მუხლის პირველი პუნქტით გათვალისწინებული სუბიექტის მიერ პროგრამის ერთობლივად განხორციელებას, როდესაც პროგრამის დარგობრივი მოდულებით გათვალისწინებული კრედიტების 50%-ზე მეტის შესაბამისი სწავლის შედეგები მიიღწევა სასწავლო საწარმოში.
2. დუალური სწავლებისას პროგრამის ხანგრძლივობა უნდა იყოს არანაკლებ 2 წლისა.
3. დუალური სწავლებისას პროფესიულ სტუდენტსა და ამ წესის მე-4 მუხლის პირველი პუნქტით გათვალისწინებულ სუბიექტს შორის, საქართველოს კანონმდებლობით

დადგენილი წესით, ფორმდება შრომითი ან სამუშაოს შესრულების/მომსახურების გაწევის შესახებ ხელშეკრულება, რომელიც, სხვა საკითხებთან ერთად, უნდა ითვალისწინებდეს პროფესიული სტუდენტის მიერ ამავე საწარმოში მისაღწევ სწავლის შედეგებთან დაკავშირებული სამუშაოს შესრულებას.

4. კოოპერაციული სწავლება გულისხმობს უნივერსიტეტისა და ამ წესის მე-4 მუხლის მე-2 პუნქტით განსაზღვრული სუბიექტის მიერ პროგრამის ერთობლივად განხორციელებას, როდესაც შესაბამისი პროგრამის დარგობრივი მოდულებით გათვალისწინებული კრედიტების არაუმეტეს 50%-ის შესაბამისი სწავლის შედეგების მიღწევა ხდება რეალურ სამუშაო გარემოში, გარდა ამ მუხლის მე-4 პუნქტით დადგენილი შემთხვევისა.

5. პროფესიული საგანმანათლებლო სტანდარტით განისაზღვრება კოოპერაციული სწავლების ფარგლებში პროგრამის დარგობრივი მოდულებით გათვალისწინებული კრედიტების 50%-ზე მეტის შესაბამისი სწავლის შედეგების მიღწევის შესაძლებლობა/დასაშვებობა რეალურ სამუშაო გარემოში.

მუხლი 4. პროგრამის დუალური და კოოპერაციული სწავლების სახით განხორციელების უფლების მქონე სუბიექტები

1. ბსუ-სთან ერთად პროგრამის დუალური სწავლების სახით განხორციელების უფლება აქვს/აქვთ პირებს, რომელსაც საქართველოს კანონმდებლობით დადგენილი წესით დამოუკიდებლად/რომელთაც ერთობლივად მოპოვებული აქვს/აქვთ სასწავლო საწარმოს სტატუსი (შემდგომში – სასწავლო საწარმო).

2. ბსუ-სთან ერთად პროგრამის კოოპერაციული სწავლების სახით განხორციელების უფლება აქვს მეწარმე სუბიექტს/იურიდიულ პირს ან საქართველოს კანონმდებლობით დადგენილი წესის შესაბამისად მიკრო/მცირე ბიზნესის სტატუსის/ფიქსირებული გადასახადის გადამხდელის სტატუსის მქონე პირს.

3. ბსუ-სთან ერთად პროგრამის კოოპერაციული სწავლების სახით განხორციელების მიზნით, ამ მუხლის მე-2 პუნქტით განსაზღვრული პირი უნდა აკმაყოფილებდეს შემდეგ კრიტერიუმებს:

ა) აცნობიერებდეს პროგრამის განხორციელების პროცესში ჩართულობის მნიშვნელობას და საკუთარ, როგორც საგანმანათლებლო მომსახურების მიმწოდებლის, პასუხისმგებლობას და ჰქონდეს პროგრამის განხორციელებაში ჩართვის მოტივაცია;

ბ) მისი ადამიანური და მატერიალური რესურსი შესაბამისობაში უნდა იყოს პროგრამის მოთხოვნებსა და სწავლის შედეგებთან;

გ) უზრუნველყოს პროფესიული საგანმანათლებლო პროგრამით გათვალისწინებული სწავლის შედეგების მიღწევის შესაძლებლობა;

დ) საქართველოს კანონმდებლობის შესაბამისად ლიცენზიას/ნებართვას ან სხვა სპეციალურ რეგულირებას დაქვემდებარებული საქმიანობის განხორციელების შემთხვევაში, მოპოვებული ჰქონდეს ლიცენზია/ნებართვა ან სპეციალური რეგულირებით გათვალისწინებული სხვა უფლებამოსილება;

4. ბსუ-სთან ერთად პროგრამის კოოპერაციული სწავლების სახით განმახორციელებელი სუბიექტთან მიმართებით ამ მუხლის მე-3 პუნქტით გათვალისწინებული კრიტერიუმების უნივერსიტეტის მიერ შეფასების მტკიცებულება შესაძლოა იყოს:

ა) გასაუბრება აღნიშნულ სუბიექტებთან;

ბ) სამუშაო შეხვედრები (სამუშაო შეხვედრის ოქმები) ამ სუბიექტებთან;

გ) სუბიექტის მხრიდან კოოპერაციულ სწავლებაში ჩართული ადამიანური რესურსის პირადი საქმეები;

დ) სუბიექტის მხრიდან კოოპერაციულ სწავლებაში გამოსაყენებელი მატერიალური რესურსის ფლობის დამადასტურებელი დოკუმენტაცია/ვიზუალური დათვალიერება;

ე) სუბიექტის მიერ საქმიანობის განხორციელების თაობაზე ლიცენზია/ნებართვა ან სპეციალური რეგულირებით გათვალისწინებული სხვა უფლებამოსილების დამადასტურებელი, კანონმდებლობით დადგენილი წესით გაცემული დოკუმენტი.